

## LACTUCA SAGITTATA.

**L**actuca foliis sinuato-dentatis; radicalibus ovato-oblongis, caulinis sagittatis, lobis acuminatis.

**RADIX** biennis, carnosae substantiae duriuscula alba, tecta epidermide fusca, primo anno napulum pollicarem aut sesqui-pollicarem, digiti auricularis crassitie, fusiformem simplicem aut & bifidum, rectum aut curvatum formans; altero vero, quo caulem protrudit, fibras praesertim e basi, in fertiliore solo etiam e lateribus plures promens.

**CAULIS** solitarius, erectus, tri-quadripedalis, raro brevior, teres, calamus scriptorium crassitie aequans, raro superans, simplex, tantum suprema parte ramos floriferos in corymbum dispositos proferens, totus nudus, rore cano detergibili tectus, hoc deterso nitidus, omnino glaber.

**FOLIA** tenuia, tenera, nuda, glabra, subtus venosa. Radicalia, quae cum caulinis inferioribus versus tempus florescentiae arida evanescent, ovato-oblonga, in petiolum decurrentia, sinuato-dentata. Petiolis subtus obtuse carinatis, supra foliorum margine utrinque decurrente canaliculatis. Caulina amplexicaulia, integra, versus caulis summitatem successive decrescentia; infima ovato-oblonga, in petiolum amplexicaulem, basi utrinque laciniis aliquot dentatum attenuata; proxima sinuato-dentata, hastata, versus basin angustata, basi utrinque lacinia acuta prominente; superiora sagittata, in acumen longum terminata, denticulata; summa integerrima tandem in squamas bracteales decrescentia.

**FLORES** in corymbo subfastigiato, spithamam latitudine aequante. Pedunculi teretes, florum centralium tam caulis quam ramorum calycibus breviores, reliqui iisdem longiores, squamis duabus tribusve minutis acutis basi dilatatis & gibbis tecti.

**CALYCES** oblongi, subcylindrici: squamis purpureo marginatis & punctatis, extimis brevibus subovatis acutis, interioribus linearibus obtusiusculis, intermediis apice appendiculo compresso purpureo auctis, sub maturitate fructus omnibus reflexis pedunculos obtegentibus:

**COROLLULAE** duodecim-quatuordecim: tubulis pallidis calyces aequantibus. ligulis subplicatis quinque dentatis, flavis, extimis communiter subtus, reliquis denticulis tantum purpurascens.

**STAMINA** filamentis capillaribus pallidis, antheris flavis, e tubulo prominentibus.

**PISTILLUM** germine oblongo, albo, stylo filiformi flavo; stigmatibus binis, e tubo antherarum prominentibus, flavis, recurvis.

**SEMINA** compressa, utrinque sulcata, costis longitudinalibus scabra, nigra, apice attenuata in stipitem setaceum. Pappus pilosus, albus.

Tota planta, exceptis feminibus, glabra, pallide viridis, sauciata succum lacteum album amarum fundens.

Crescit in sylvis ad Gödöllö & Nagy-Karoly. Floret Julio.

Accedit saltem foliorum forma ad *L. Augustanam* *Allion. Ped. t. 52. f. 1.* sed differt facie; caule simplici, ramis corymbosis, foliis inferioribus versus basin angustatis; feminibus nigris; colore partium pallido; loco natali umbroso fertili. *L. Chai-xii. Villars delph. 3. p. 154. t. 32.* differt a nostra planta: foliis radicalibus runcinato-lyratis, caulinis sagittatis, argute dentatis, lobis truncatis dentatis, racemo terminali simplici duodecim-vigintifloro; calycibus brevioribus subovatis; radice annua.



*Lactuca sagittata.*